

# 中國易學文獻集成續編

58

本書編委會◎編

全七十冊

國家圖書館出版社

# 中國易學文獻集成續編

本書編委會◎編



國家圖書館出版社

(清)黃式三撰

易釋四卷(卷三—四)

清光緒間刻《傲居遺書》本

# 第五十八册目錄

易釋(卷三—四) (清)黃式三撰 清光緒間刻《做居遺書》本

卷三

..... 一

卷四

..... 八九

周易姚氏學十六卷(卷一—十二) (清)姚配中撰 清光緒間刻《皇清經解續編》本

序

..... 一三七

卷一

..... 一六七

卷二

..... 一九七

卷三

..... 二二五

卷四

..... 二五七

卷五 ..... 二九三

卷六 ..... 三三三

卷七 ..... 三六九

卷八 ..... 四〇三

卷九 ..... 四三九

卷十 ..... 四七五

卷十一 ..... 五一三

卷十二 ..... 五五一

第五十人部目錄

易釋

疑義分析三

定海黃式三學

上篇經傳

乾彖傳曰雲行雨施坎也大明離日也晉彖傳大明亦指  
離日禮大明生于東是也日有昏必有旦終而復始昏旦  
各行六辰六辰由大明而成乾象乘六龍以行天之氣坎  
離通亨之道也天之亨必順其時坎雨以時施離明以時  
行

乾道變化變則通利也二位不當以見大人而貞四位不

當以在淵而貞上位不當以有悔而貞是謂各正性命正  
卽貞也保合太和保亦貞和亦利保守竝育竝行之氣乃  
是利貞也乾交坤而陰陽相應則利陰陽各當其位則貞  
易道重變應當位

乾象傳曰潛龍勿用陽在下也以天氣言如雷伏地中以  
人事言如舜之耕漁與世子之居潛邸皆是非龍不昇稱  
潛雖潛无損于龍在下釋潛之義

易之上爻或以爲勝國之裔如萃上六是或以爲勝國之  
主如明夷上六是或以爲宗廟之主如師上六是或以爲

致仕之賢如遯上九是或五六而上九則五母而上父如  
蠱上九是或以爲天子師如大有大畜之上九此例尤多  
其有太皇后之象者如坤之上與乾龍交而其子爲龍爲  
元黃是也有太上皇之象如乾上九是也上曰亢龍有悔荀  
慈明釋之曰升極當降故有悔鄭君康成釋之曰堯之末  
季四凶在朝是以有悔未大凶也其皆以倦勤者言歟式  
三案象傳曰亢龍有悔盈不可久也以天道言如亢陽爲  
旱以人事言如昏耄倦勤而猶未退皆盈不可久之象也  
人主當倦勤之時不擇攝政之賢賢而失位有民而失民



有賢人而不升此亢之所以為害周穆王卽位年已五十能振衰微末季有侈心之失適為盛德之累堯之末季洪水泛濫四岳四凶襍用未嘗无悔而卒舉舜以禪位焉是知進退之聖人有悔終无凶也李氏鼎祚于上之爻解之曰以人事明之若桀放南巢湯有慙德是以九五之湯為上九之有悔者也于文言傳轉一解曰此論人君驕盈過亢必有罣亾如殷紂招牧野之災太康邁洛水之怨信如是則大凶矣豈止悔乎李氏又于不失其正之注引崔氏憬之說云失其正者如燕噲讓位于子之之類不愆燕噲

非亢之悔擬不于倫矣漢魏諸儒之說賴李氏而存而此注如崔氏說不必存而鄭君之說宜存而不存可謂擇之不精矣然則漢魏之舊注有足以翼經而不存者豈止此哉

用九天德不可爲首也言元亨利貞之四德備物无以上之也郎雅光顓曰唐堯在上羣龍爲用鄭君康成曰六爻皆體乾羣龍之象如舜旣受禪禹與稷契咎繇之屬竝在于朝宋仲子衷曰用九六位皆九故曰見羣龍純陽則天德也萬物之始莫能先之由郎說鄭君宋氏注繹之見羣

龍者上下各以剛德相見也剛為天德羣龍盡見天德之盛无以上之首上也不可為首言无有駕其上者而非謂乾剛不可為物首也不可為物首則非天德矣文言傳曰乾元用九天下治也以用九為元則為物首也羣陽為首則天下治羣陰為首則天下亂天下之治由于天德之為首也故乾為首曰首出庶物舊解多謬非特不知天德而天下治亂之由亦昧昧矣此由王輔嗣誤之也

乾文言傳曰知至至之知終終之解之者析義雖精于九三之象未有確指猶是燕說郢書耳式三謂知至至之為

其所宜爲而无不至也三居下體之極進于見龍在田之  
上日乾乾行事而自不驕也知終終之不爲其所不可爲  
而止之也三居上體之下无可躍之候惕而无咎故在下  
不憂也八卦終于三爻六十四卦終于六爻此言終言下  
卦之終百坤三曰无成有終謙三曰君子有終睽三曰无  
初有終皆以三爲終

學以聚問以辨寬以居仁以行九四介乎潛躍之間非學  
問非寬仁不能進无咎也

坤象傳曰含弘光大含猶含章之含光廣通謂地之廣博

文言傳曰含萬物而化光含廣皆坤之德也坤以含配乾之宏而无所不有以廣配乾之大而无所不至乾坤氣通萬物暢遂是爲嘉會之亨也

坤初象傳曰馴致其道至堅冰也明其六陰凝聚陽自馴成之而初欲變復之難也坤亥月卦六陰凝聚時不甚寒或有霜无冰或有冰不堅至子月一陽生陰與陽敵激爲甚寒堅冰乃至坤初欲變復復者陰轉爲陽之交正陰欲敵陽之候聖人望其變而戒其變之易激也孔聖作春秋凡亂臣賊子必戒于漸與易同義故知易重戒辭非必凶

也

坤二象傳不習无不利地道光也光廣通正釋爻之大坤  
二因直方而大行于東北巽朋之地而亦利是非絜習而  
亦利也故廣彖傳曰含弘光大文言傳曰含萬物而化光  
光皆通廣文言傳敬義立而德不孤不孤卽廣大也坤道  
之廣卽乾道之大也道未有直方而不大者內直外方而  
所行必大道雖非習行而可不疑也人行歧途而易疑聖  
人教以行大道乃不疑所行无不利也先儒以坤二之直  
方與履霜含章括囊黃裳玄黃爲韻象傳文言傳不釋大

字疑大字爲衍不知象傳地道廣文言傳德不孤皆釋大  
義李氏集解引荀注本有大字乎吳氏纂言讀大不習爲  
句釋不習爲不重習言大算與比也失坤順之義矣惠氏  
周易述讀習爲襲訓重以不習爲不煩重筮亦非

坤四象傳曰慎不害也見處坤之時所重在慎耳文言傳  
曰蓋言謹也義正同易道重戒辭于坤初四見之初文言  
傳蓋言順也順一化慎皆通

坤上象傳龍戰于野其道窮也戰交也窮極也坤陰盛極  
與乾交媾也說文戰鬪也鬪遇也又于壬字下引易龍戰

于野云戰接也遇接交同義鄭君于說卦傳戰乎乾注云戰言陰陽相薄西北陰也而乾以純陽臨之猶君臣對合也于雷風相薄注云薄入也鄭君許氏入接二義相足鄭君言君臣對合者彼承帝出言之故言君臣而交義則以夫婦交媾言也坤六陰成于亥乾位西北正陰陽交媾之義坤血黃既交乾則兼有元色故曰其血玄黃曰血者初交未成胎也其後震爲龍爲元黃本于乾坤之氣血也文言傳曰陰疑于陽必戰疑擬通禮檀弓疑女于夫子義同爲其兼于陽也兼本亦作嫌者銜也鄭君本作謙讀爲慊



慊襍也天地之襍襍猶合也詩言襍佩漢書言襍治其義同在易陽為氣陰為血龍者天之氣而坤承天之氣以充其血元黃者天氣之合于血故曰天地之襍也天地之物獨陽不生獨陰不生乾成六陽旁通于坤坤成六陰旁通于乾天地氣通蒼成元黃之血詩稱十月為歲陽亦龍交陽兼之義也

坤文言傳正位居體正位者正坤位也居蹲也見說文體謂四體也今字作股作腿古祇作體君為元首臣為股肱故言體以喻臣道也君子以黃中行道正其臣位蹲屈其